

Ineqarnermut, Attaveqarnermut Aatsitassanullu Naalakkersuisoq
Landsstyremedlem for Boliger, Infrastruktur og Råstoffer

Inatsisartunut ilaasortaq Kristian Jeremiassen

§ 36 naapertorlugu apeqqummut akissuteqaat: Qasigiannuani, Qeqertarsuarmi, Kangaatsiamilu imaatigut silaannakkullu angallanneq maannakkumiit allaanerusumik isikkulerlugu 2007-imiit aallartittumik aaqqissuussiffigineqarniarpa?

Asasara Kristian Jeremiassen.

Qasigiannuanut Qasigiannuaniillu, Qeqertarsuarnut Qeqertarsuarniillu kiisalu Kangaatsiamut Kangaatsiamiillu angallanneq pillugu apeqquternut matumuuna akissuteqaatit aajuku.

10.11 2006
32.98+1
Postboks 909
3900 Nuuk
Oq/tel +299 34 54 00
Fax +299 34 54 10
iap@gh.gl
www.nanoq.gl/iap

1. Naalakkersuisut isumaliutigivaat ukioq kaajallallugu Qasigiannuani, Qeqertarsuarmi, Kangaatsiamilu timmisartoqartaleqqinnissaa?

Angallannermut missingersuutinit ataatsimoortunit ukiumut 95 millioner kr. missaanni sipaaruteqarnissamik Inatsisartut aalajangiinerat tunngavigalugu 1. januar 2006 aallarnerfigalugu angallasseriaaseq nutaaq eqqunneqarpoq.

Angallannermi sullissinissamat isumaqatigiissutissat 2005-imi upernaakkut neqerooruteqarfigitinneqarmata anguniakkami tassani "Aningaasaliissutit atorlugit angallanneq annertunerpaaq" siunnerfigineqarpoq. Tamanna tunngavigalugu neqerooruteqartussanut najoqqutassat pingasuusut aalajangersarneqarput, tassalu: akiusoq, pitsaassuseq patajaatsumillu sullissisinnaassuseqarneq, taakkunanngali tamanit akiusoq pingaernerutinneqarpoq. Tassalu angallasseriaatsip akikinnerpaap, kisiannili aamma patajaannerpaap toqqarneqarnissaa siunertaasimavoq.

Angallasseriaatsimi nutaami angallasseriaaseq ataasiinnaq eqqunneqarpoq, taamatumuuna ilaasunut inissat atorluarneqarnerunissaat qularnaarneqarluni. Siornatigut angallaviit ilaat – aamma ilanngullugu Qeqertarsuup Tunua – angallasseriaatsit marluk atorlugit angallavigineqartarput, taamanikkullu angallavinni taakkunani angalasussat namminnerlutik aalajangersinnaasarpaat timmisartoq umiarsuarluunniit atorlugu angalassanerlutik. Nunap Karsia taamaalilluni angallasseriaatsinut imminnut unammilleqatigiinnut marluusunut tapissuteqartarsimavoq. Angallannermut missingersuutit pingajorarterutaasa missannik annertussuseqartunik sipaaruteqarnissamik Inatsisartut aalajangeereerneranni angallannermut tapiissutigineqartartunik ikilisaanissaq

pisariaqalersimavoq. Taamaattumik siunissami taamaallaat angallasseriaatsimut aningaasatigut imminut akilersinnaanerusumut tapiissuteqartoqartassaaq.

Umiarsuakkut angallassineq qulimiguulimmik angallassinermi – Nunap Karsianut aammalu ilaasunut – akikinnerungaatsiartussaammat, Qeqertarsuup Tunuani aasaanerani maajip ulluisa 16-anniit novembarip ulluisa 30-annut umiarsuakkut angallassisoqartassasoq ukiuuneranilu decembarip ulluisa aallaqqaataanniit maajip ulluisa 15-annut qulimiguulik atorlugu angallassisoqartassasoq aalajangertoqarpoq.

Disko Line A/S aasaanerani Qeqertarsuup Tunuani imaatigut angallassisuusoq peqatigalugu ukariartornerani nalilersuisoqarpoq. Ineqarnermut Attaveqarnermullu Pisortaqrifiup naliliinera naapertorlugu imaatigut angallanneq annertunerpaartaatigut naammaginartumik ingerlasimavoq. Taamaattorli pinngitsoorneqarsinnaanngilaq qulimiguulik atorlugu angallannermut naleqqiullugu aasaanerani umiarsuit atorlugit angallannermi piffissaq taavani angalanermut atorneqartariaqartoq sivilisunerussaammat.

Aqqutissat pitsaanerpaajunissaat angalanissamut pilersaarutit suliarineqarnerini siunertaasimavoq. Taamaattorli Qasigiannuanit, Qeqertarsuarmut Kangaatsiamillu ullup ataatsip ingerlanerani aqquteqartarnissaa iluatsissimangilaq. Taamaattoqassappat angallavimmi amerlanerusunik umiarsualiinissaq pisariaqartussaavoq, tamatumani ullumikkut ilaasartunut naleqqiullugu amerlanerusunik ilaasoqartarnissaq pisariaqarpoq.

Qeqertarsuup Tunuani aasaanerani imaatigut angallanneq naliliiffigineqarmat bilitsinik inniminniisarnermi ajornartorsiutaasimasut aamma ilanngullugit naliliiffigineqarput. Imaatigut angallavimussumi tullermi tamanna aqqiivigineqassaaq, bilitsilerinermi atortorissaarut nutaaq umiarsuarnut bilitsinik ilaasussat pissarsiniartarnerannik ajornannginnerulersitsisussaq suliarineqarsimammat.

Taamaalilluni Naalakkersuisut naliliipput Qeqertarsuup Tunuani aasaanerani imaatigut angallanneq naleqquttumik ingerlasimasoq. Taamaattumik Disko Line A/S-imut imaatigut angallassinermi sullissinissamik isumaqatigiissutip nunap immikkoortuani ukioq tamaat qulimiguulimmik timmisartuussisalernissamut allanngortinneqarnissaa pissutissaqarsorineqanngilaq.

2. 2007-imi imaatigut angallannikkut umiarsuarnik anginerusunik Qasigiannugit, Qeqertarsuaq, Kangaatsiarlu tikittoqartalernissaa innuttaasut naatsorsuutigisinnaavaat?

Umiarsuarnik anginerusunik angallassinermik oqarnermi naatsorsuutigaara Arctic Umiaq Linep imaatigut angallassinera pineqartoq.

Sinerissami imaatigut angallassisoqaannarnissaa innuttaasunit kissaatigineqarsimavoq, taamaattumik nuannaarutissaavoq sinerissami ukioq tamangajaat imaatigut angalasoqarsinnaanngorlugu Arctic Umiaq Line nutaaq aqqiissuteqartussanngormat. Aningaasaliissutaasut atorlugit atorsinnaasumik

aaqqiissuteqarnissaq aammattaaq Naalakkersuisut pingaartissimavaat. Tamatuma malitsigisaanik Nunap Karsia amigartooruteqarnissamut qularnaveeqquusiisimavoq, kisiannili erseqqissaatigineqassaaq suliffeqarfiup imminut akilersinnaasumik ingerlatsisinnanera upperalugu ingerlatseqatigiiffik pilersinneqarmat.

Erseqqissaatigineqassaaq ingerlatseqatigiiffiusimasup pigisami tuninissaannik aalajangereernerata kingorna Arctic Umiaq Line nutaaq pilersinneqartoq tapiissuteqarfigineqarani niuerpalaartumik tunngaveqarluni angallassisussaammat. Tamatuma nassataraa Arctic Umiaq Linep nammineerluni suminngaaniit sumut angallassisassanerluni aalajangertussaammagu. Tamanna angallavimmut pineqartumut imaatigut angallassineq qanoq imminut akilersinnaatiginersoq pillugu naliliinerit tunngavigalugit aalajangerneqartassaaq. Illoqarfiit nunaqarfiillu angallavigineqan-ngitsut Arctic Umiaq Linep aamma Air Greenlandip angallassivigisartagaanni angalaniarunik sullissinissamik isumaqatigiissuteqarlutik angallassisut aqqutigisariaqarpaat.

Sinersortaatit atorlugit angallassineq tapiissuteqarfigineqarani suli ingerlanneqarmat Arctic Umiaq Line illoqarfinnut sorlernut angallasassanersoq Naalakkersuisut akuliuffigisinnaangilaat. Tassunga atatillugu ilisimatitsissutigisinnaavara Arctic Umiaq Linep nalunaarutigisimammagu Qasigiannugit, Qeqertarsuup aamma Kangaatsiap 2007-mi tikinneqartarnissaat pilerlaarutigineqanngitsoq.

3. Imaatigut silaannakkullu angallassineq siunissami Naalakkersuisut Qasigiannuani, Qeqertarsuarmi, Kangaatsiamilu qanoq ittoq takorloorpaat?

Soorlu apeqqummut siullermut atatillugu eqqaareeringa, angallasseriaaseq ataasiinnaq eqqunneqarpoq, taassumalu malitsigisaanik angallasseriaatsimut ataasiinnarmut tapiissuteqartoqarsinnaalerpoq. Taamaattumik naatsorsuutigineqarpoq sullissinissamut isumaqatigiissutit 2010-ip tungaanut atuuttussat naapertorlugit aasaanerani imaatigut angallassisarneq ukiuuneranilu qulimiguulinnik timmisartuussisarneq ingerlaannassasut.

Neriuppunga apeqqutitit matumuuna naammaginantumik akissuteqarfigisimassallugit.

Ikinngutinnersumik inuulluaqqusillunga

Jørgen Wæver Johansen